



God haat dit

Gewoontegodsdiens is 'n godsdiens waar die Here slegs uit gewoonte dien sonder opregte toewyding. Vormgodsdiens kan 'n godsdiens met baie aktiwiteite wees, maar die hart vol liefde ontbreek – 'n godsdiens dus met 'n vorm sonder inhoud. Meganiese godsdiens is 'n godsdiens wat die Here soos 'n masjien dien sonder dat daar oorgawe en bewuste aanbidding is. God haat 'n koue gewoonte, 'n hol vorm en die onpersoonlikheid van 'n masjien in jou godsdiens. Deur sy profete het die Here sy volk telkens daarteen gewaarsku vgl. Jes. 1 : 11 13; Hos. 6; Am 5 : 21 - 23).

God vra diep

God is nie tevrede met net 'n oppervlakkige vernislagie nie. Hy vra diep en alles. Kom ons noem vier voorbeelde, Matthéüs 16 : 24 “As iemand agter My aan wil kom, moet hy homself verloën en sy kruis opneem en My volg.” Om waarlik Christen te wees moet jy jou eie belange tweede plaas, want God wil eerste wees. Matthéüs 10 : 37: “Wie vader of moeder bo My liefhet, is My nie waardig nie.” Selfs in die innigste verhoudinge wil God eerste wees. Lukas 9 : 62: “Niemand wat sy hand aan die ploeg slaan en agtertoe kyk, is geskik vir die koninkryk van God nie.” Jy kan dus nie sê dat jy 'n Christen is en half hartig nog na die sondige wêreldse lewe verlang nie. God vra diep en alles, dat jy Hom moet liefhê met jou hele hart en siel en met al jou kragte. Teenoor 'n oppervlakkige gewoonte- en vormgodsdiens vra God opregtheid, oorgawe en toewyding.

Dit is gevaarlik

'n Godsdiens wat net by die oppervlak volstaan kan gevaarlik wees, want jy raak so selftevrede met jou diens aan God, maar dit kan die toets voor God nie slaag nie. Aan die einde van sy Bergrede vertel Jesus van twee mans (Matt 7 : 24 27). Die een was opreg in sy godsdiens, want hy het gehoor en gedoen. Sy huis het op die rots gestaan. Die ander man het wel gehoor, maar nie gedoen nie. Hy het dus halfpad vasgesteek. Sy godsdiens het 'n mooi vorm gehad, maar nie 'n inhoud nie. Hy het 'n indrukwekkende buitekant gehad met 'n skyn van godsdiens, maar hy het nie diepte gehad nie. Daarom vergelyk Jesus hom met 'n man wat sy huis op sand gebou het. Daar sit iets van 'n trotse selftevredeheid in die man. Hy is so tevrede met sy huis dat hy hom nie oor die sand bekommer het nie. Maar hoe gevaarlik kan dit nie wees nie. Sy huis kon teen die reën en wind nie bly staan nie – 'n verwysing na God se oordeel.

Toewyding maar hoe?

Sommige mense glo dat die predikant mense moet bang preek met die hel en die ewige straf, want dit sal hulle in aksie bring. Waar dit gebeur en lidmate in aksie kom, is dit nie opregtheid en toewyding nie, maar vrees. Hoe kan die toewyding en opregtheid in my godsdiens aangevuur word? Besef veral drie dinge:

Eerstens moet jy besef dat jou geloof 'n ontsaglike rykdom behels. Jesus het eenmaal in kort gelykenis vertel van 'n persoon wat op 'n skat afgekom het (vgl. Matt 13 : 44). En toe die man besef hoe ryk die skat is, het dit hom in beweging gebring en hy het tot opoffering gekom. Hy het al sy besittings verkoop om daardie grond met die skat te kon koop.

In die tweede plek moet jy die wonder van die liefde van Christus aan die kruis besef, want Paulus vertel dat daardie liefde jou dring om nie meer vir jouself te lewe nie, maar met toewyding vir God (2 Kor. 5 : 14 15).

Derdens is geen opregte toewyding in jou godsdiens sonder die Heilige Gees moontlik nie. In die Heidelbergse Kategismus bely ons dat die Heilige Gees ons van harte gewillig en bereid maak om vir Christus te lewe vgl. H.K. Sondag 1.

© 2016

www.christelikemedia.org